

Weh Wi Ga Fi Seh

*Gi yu best tu weh
yu du tudeh!*

Di UB Kriol lichrasi klaas di goh gud gud gud!

Yes! Ah feel soh glad-faitn dat di Kriol lichrasi klaas di goh soh gud gud! Memba wi mi tel unu bowt dat wahn week er too abak? Da di **UB Institute for Cultural and Indigenous Languages** hoo aafa dis 4-week sertifiket klaas, wid sopoat a di **Nashanal Kriol Kongsl** (di Langwij Groop). Di klaas nayhn “Introduction to Bileez Kriol Literacy.” Wel muma! Wel pupa! Wan a di ting dehn weh di styoodent dehn hafu du da fi rait sohnting fi disya sayhn “Weh Wi Ga Fi Seh” nyoozpaypa an aanlain Kriol spays. Now, chek dis: Dis asainmnet joo di laas day a klaas. Bot wan a di laydi dehn eena di klaas don rait op wahn deh-aan lee poayem. Soh, wi di shyaa dis tudeh! Ih raita naym da: **Kingzli J. Maiya**

Sayka Ai Lov Mi Kriol

bai Kingzli J. Maiya

Wen Ah mi ayt,
Dehn mi kehr mi da stayts.
“Fi wi Kriol—nohmoh,” seh mi pa ahn mi ma,
“Fahn tudeh aan yu English wahn bee loan *propa*.”
Ah noh wahn lai;
Ah reeli mi-di chrai,
Bot dis mi-di mek mi spirit feel soh sad sad,
Akonk a mi Kriol weh Ah lov soh bad bad.
Giv ahn op? Ai wahn neva!
Sayka Ai wahn lov mi Kriol fareva!

Weh di pipl dehn eena di UB Kriol Lichrasi klas di laan:

(1) Andastan bowt di Bileez Kriol raitn sistim (2) Laan bowt Bileez Kriol grama ahn sentens schrokcha (3) How fi reed Bileez Kriol (4) How fi rait eena Bileez Kriol (5) How fi chranslayt fahn English tu Bileez Kriol ahn di neks way.

Silvaana Udz, Ed.D. da paat a di Kriol Langwij Groop a di Nashanal Kriol Kongsl a Bileez. Yu waahn shyaa er aks sohnting? Eemayl: sudz142@gmail.com Vizit: www.nationalkriolcouncil.org